

BOSNA I HERCEGOVINA
FEDERACIJA BOSNE I HERCEGOVINE
UNSKO SANSKI KANTON
GRAD BIHAĆ
GRADONAČELNIK

Broj: 07/2-05-_____/2017

Bihać, _____

Na osnovu člana 140. Poslovnika o radu Gradskog vijeća (Službeni glasnik Grada Bihaća broj 3/16) i člana 52. stav 1 tačka b) Statuta Grada Bihaća (Službeni glasnik Grada Bihaća broj 13/15), gradonačelnik, u svojstvu predlagača odluka i drugih akata

O d r e đ u j e

I z v j e s t i o c a Alisu Mahmutagić, dipl. pravnik na sjednici Gradskog vijeća i radnim tijelima po prijedlogu tačke dnevnog reda:

Prijedlog Odluke o raspisivanju izbora za članove savjeta mjesnih zajednica i predsjednike mjesnih zajednica.

GRADONAČELNIK
ŠuhretFazlić

BOSNA I HERCEGOVINA
FEDERACIJA BOSNE I HERCEGOVINE
UNSKO SANSKI KANTON
GRAD BIHAĆ
GRADONAČELNIK

Broj: 07/2-05-_____/2017

Bihać, _____

GRADSKO VIJEĆE

PREDMET: Prijedlog Odluke o raspisivanju izbora za članove savjeta mjesnih zajednica i predsjednike mjesnih zajednica

Na osnovu člana 52. stav 1 tačka b) Statuta Grada Bihaća (Službeni glasnik Grada Bihaća broj 13/15) i člana 140. Poslovnika Gradskog vijeća Grada Bihaća (Službeni glasnik Grada Bihaća broj 3/16), dostavljam vam na usvajanje prijedlog Odluke o raspisivanju izbora za članove savjeta mjesnih zajednica i predsjednike mjesnih zajednica uz sljedeće

O b r a z l o ž e n j e

I PRAVNI OSNOV

Pravni osnov za donošenje Odluke o raspisivanju izbora za članove savjeta mjesnih zajednica i predsjednike mjesnih zajednica sadržan je u članu 91. stav 1. Statuta Grada Bihaća kojim je propisano da Gradsko vijeće donosi odluku o raspisivanju izbora u mjesnim zajednicama.

Članom 91. stav 3 Statuta propisano je da se odlukom o raspisivanju izbora u mjesnim zajednicama utvrđuje: način provođenja izbora, naziv mjesnih zajednica i broj članova savjeta koji se bira, mjesto i vrijeme održavanja izbora, organi za provođenje izbora, sredstva potrebna za provođenje izbora, način utvrđivanja i proglašavanja rezultata izbora i druga pitanja u vezi sa izbornim procesom.

II RAZLOZI ZA DONOŠENJE ODLUKE

Razlog za donošenje predmetne Odluke je prestanak mandata članova savjeta mjesnih zajednica i predsjednika mjesnih zajednica.

Prethodni izbori za članove savjeta i predsjednike mjesnih zajednica održani su 14. i 15. decembra 2013. godine, nakon čega je Općinsko vijeće Općine Bihać donijelo Odluku o potvrđivanju rezultata izbora za predsjednike mjesnih zajednica i članove savjeta mjesnih zajednica broj 02-02-9352/13 od 26.12.2013. godine.

Prema odredbi člana 95. stav 1 statuta Grada Bihaća mandat članova savjeta mjesne zajednice traje četiri godine, a sličnu odredbu sadržavao je i ranije važeći Statut Općine Bihać- prečišćeni tekst (Službeni glasnik općine Bihać broj 2/11) u članu 75. stav 1.

S obzirom na navedeno potrebno je pristupiti raspisivanju izbora u mjesnim zajednicama kako bi se osigurao kontinuitet rada mjesnih zajednica.

III POJAŠNJENJE PRIJEDLOGA

Prijedlogom Odluke o raspisivanju izbora za članove savjeta mjesnih zajednica i predsjednike mjesnih zajednica, u skladu sa članom 96. Statuta utvrđuje se broj članova savjeta mjesnih zajednica koji se bira za svaku mjesnu zajednicu, a koji je utvrđen prema podacima o broju stanovnika po mjesnim zajednicama prema posljednjem popisu stanovništva.

S obzirom da mandat članova savjeta mjesnih zajednica prestaje istekom roka od četiri godine od dana stupanja na snagu odluke o potvrđivanju rezultata izbora, svrsishodno je da se kao dan održavanja izbora odrede 16. i 17. decembar 2017. godine, kako bi se osigurao kontinuitet rada mjesnih zajednica.

Prijedlogom Odluke predlaže se da se izbori održe u vremenu od 09-16 sati kako bi se osiguralo s jedne strane dovoljno vremena da svi zainteresirani građani glasaju, ali s druge strane i da se, vodeći računa o tome da se izbori provode u zimskom periodu, zbog čega je potrebno osigurati zagrijavanje prostorija u kojim se održavaju izbori, uštedi na materijalnim troškovima za održavanje izbora.

Predloženi organi za provođenje izbora su Komisija za provođenje izbora i Birački odbori koje imenuje Gradsko vijeće.

Prema prijedlogu Odluke u slučaju prestanka mandata članova savjeta i predsjednika mjesne zajednice prije isteka vremena na koje su izabrani, za predsjednika mjesne zajednice imenovat će se sljedeći kandidat sa najvećim brojem glasova, a za člana savjeta mjesne zajednice prvi kandidat sa zamjenske liste kandidata.

IV FINANSIJSKA SREDSTVA

Sredstva za provođenje izbora u mjesnim zajednicama osigurana su u Budžetu grada Bihaća u iznosu od 10.000 KM.

V PRIJEDLOG

Predlažem da Gradsko vijeće u skladu sa članom 91. Statuta Grada Bihaća predloženu Odluku razmotri i usvoji u predloženom tekstu.

GRADONAČELNIK
Šuhret Fazlić

Dostavljeno:

1. Naslovu
2. Evidencija
3. a/a

Na osnovu člana 91. Statuta Grada Bihać (Službeni glasnik Grada Bihać broj 13/15) Gradsko vijeće Grada Bihaća na _____ sjednici održanoj dana _____2017. godine, donijelo je:

O D L U K U
o raspisivanju izbora za članove savjeta mjesnih zajednica i
predsjednike mjesnih zajednica

DIO PRVI- OPĆE ODREDBE

Član 1.
(Predmet)

Ovom Odlukom raspisuju se izbori za članove savjeta mjesnih zajednica i predsjednike mjesnih zajednica na području grada Bihaća, utvrđuje broj članova savjeta koji se bira, način provođenja izbora, vrijeme i mjesto održavanja izbora, organi za provođenje izbora, podnošenje prijedloga, postupak glasanja, brojanje glasova, posmatrači, objavljivanje i potvrđivanje rezultata izbora, mandat članova savjeta, sredstva za održavanje izbora i druga pitanja u vezi s izbornim procesom.

Član 2.
(Gramatička terminologija)

Gramatička terminologija korištenja muškog ili ženskog spola podrazumjeva uključivanje oba spola.

DIO DRUGI- BROJ ČLANOVA SAVJETA, NAČIN PROVOĐENJA, VRIJEME I MJESTO

Član 3.

(Broj članova savjeta)

U mjesnim zajednicama održat će se izbori za članove savjeta mjesnih zajednica i izabrati broj članova savjeta kako slijedi:

r/b	Mjesna zajednica	Broj članova savjeta koji se bira
1.	Bakšaiš	7
2.	Brekovica	7
3.	Centar	5
4.	Čavkići	5
5.	Donje Prekounje	5
6.	Gata	5
7.	Golubić	5
8.	Gornje Prekounje	7
9.	Harmani	9
10.	Hatinac	5
11.	Izačić	7
12.	Jezero-Privilica	7
13.	Kamenica	5
14.	Klokot-Papari	5
15.	Kulen Vakuf	5
16.	Luke	7

17.	Mali Lug	5
18.	Martin Brod	5
19.	Orašac	5
20.	Ozimice I	11
21.	Ozimice II	7
22.	Pokoj	5
23.	Pritoka	5
24.	Ribić	5
25.	Ripač	5
26.	Ružica	7
27.	Skočaj	5
28.	Sokolac	5
29.	Srbljani	7
30.	Vedro Polje	5
31.	Veliki Lug	7
32.	Veliko Založje	5
33.	Vrsta	5
34.	Zavalje	5
35.	Žegar	5

Član 4.

(Način provođenja izbora)

Članove savjeta mjesnih zajednica biraju građani na temelju općeg biračkog prava na neposrednim izborima, tajnim glasanjem.

Član 5.

(Vrijeme i mjesto održavanja izbora)

Izbori za članove savjeta i predsjednike mjesnih zajednica održat će se dana 16. i 17.12.2017. godine, u vremenu od 09-16 sati u prostorijama mjesnih zajednica, škola i drugim pogodnim prostorijama.

Član 6.

(Objavljivanje vremena i mjesta održavanja izbora)

Mjesto i vrijeme održavanja izbora objavit će se u sredstvima javnog informisanja, na oglasnoj tabli i web stranici Grada i na oglasnim tablama mjesnih zajednica najkasnije u roku od 15 dana prije dana održavanja izbora.

DIO TREĆI -ORGANI ZA PROVOĐENJE IZBORA

Član 7.

(Organi za provođenje izbora)

Organi za provođenje izbora su Komisija za provođenje izbora i birački odbori.

Član 8.

(Komisija za provođenje izbora)

- (1) Komisiju za provođenje izbora imenuje Gradsko vijeće.
- (2) U Komisiju za provođenje izbora imenuju se članovi iz reda gradskih vijećnika i reda državnih službenika i namještenika Gradskog organa uprave.
- (3) Komisija za provođenje izbora organizuje i provodi izbore, utvrđuje konačne kandidatske liste, određuje biračka mjesta, koordinira aktivnosti u vezi sa provođenjem izbora, pruža stručnu pomoć biračkim odborima u procesu provođenja izbornih aktivnosti, vrši nadzor nad radom biračkih odbora, daje upute i pojašnjava način glasanja, te nadzire primjenu Uputstva o načinu rada biračkih odbora.
- (4) Članovi Komisije za provođenje izbora imaju pravo na naknadu za svoj rad.

Član 9.

(Imenovanje biračkih odbora)

- (1) Gradsko vijeće imenuje biračke odbore za svaku mjesnu zajednicu na zajednički prijedlog Komisije za izbor i imenovanje, Komisije za lokalnu samoupravu i gradonačelnika i to najkasnije u roku od 15 dana prije dana održavanja izbora.
- (2) Birački odbor ima tri člana i tri zamjenika i to po jednog iz reda gradskih vijećnika, iz reda službenika i namještenika Gradskog organa uprave i iz reda građana mjesne zajednice.
- (3) Članove biračkog odbora i zamjenike iz reda gradskih vijećnika predlaže Komisija za izbor i imenovanja, članove i zamjenike iz reda predstavnika mjesnih zajednica predlaže Komisija za lokalnu samoupravu, a članove i zamjenike iz reda službenika i namještenika Gradskog organa uprave gradonačelnik.
- (4) Član biračkog odbora iz reda gradskih vijećnika je predsjednik biračkog odbora.
- (5) Rješenje o imenovanju članova biračkih odbora donosi Gradsko vijeće.
- (6) Rješenje iz prethodnog stava dostavlja se svim subjektima koji učestvuju u postupku izbora, te objavljuje na web stranici Grada Bihaća i oglasnim pločama mjesnih zajednica.

Član 10.

(Prava i obaveze biračkih odbora)

- (1) Birački odbori neposredno rukovode postupkom provođenja izbora, osiguravaju pravilnost glasanja i evidentiraju rezultate glasanja za izbor članova savjeta mjesne zajednice.
- (2) Svi članovi biračkog odbora i njihovi zamjenici moraju biti prisutni tokom cijelog procesa glasanja, uključujući utvrđivanje rezultata glasanja.
- (3) Članovi biračkog odbora imaju pravo na naknadu za svoj rad.

DIO ČETVRTI- PODNOŠENJE PRIJEDLOGA

Član 11.

(Predlaganje kandidata za članove savjeta mjesne zajednice)

- (1) Prijedlog kandidata za članove savjeta mjesne zajednice (u daljem tekstu: kandidatske liste) mogu podnijeti: građani, organi političkih stranaka i druge organizacije i udruženja koja djeluju na području mjesnih zajednica, vodeći računa da predloženi kandidati imaju prebivalište na području mjesne zajednice.
- (2) Ako građani podnose kandidatsku listu, prijedlog mora biti potpisan od najmanje četrdeset građana sa područja mjesne zajednice upisanih u Centralni birački spisak.
- (3) Građani, organi političkih stranaka i druge organizacije i udruženja koja djeluju na području mjesne zajednice u pravilu predlažu najviše onoliko kandidata koliko se bira članova savjeta. Ukoliko se predloži veći broj kandidata, na listu kandidata će se uvrstiti kandidati koji su prvi po redosljedu predlaganja.
- (4) Prilikom predlaganja kandidata za članove savjeta mjesnih zajednica mora se voditi računa da sastav kandidatske liste odražava približno nacionalnu strukturu, zastupljenosti spolova i područja mjesne zajednice.

Član 12.

(Sadržina kandidatske liste)

- (1) Kandidatska lista mora sadržavati naziv predlagača, redni broj, prezime, ime jednog od roditelja i ime kandidata, izjavu o prihvatanju kandidature i ovjeren potpis predlagača.
- (2) Ako su građani predlagači, kandidatska lista mora sadržavati prezime, ime jednog od roditelja, ime, izjavu o prihvatanju kandidature za člana savjeta, JMB i potpis svih građana predlagača.

Član 13.

(Dostavljanje i provjera kandidatske liste)

- (1) Prijedlog kandidata za članove savjeta mjesnih zajednica dostavlja se u pisanoj formi putem protokola Službi za opću upravu i mjesnu samoupravu najkasnije u roku od 30 dana prije održavanja izbora.

(2) Služba za opću upravu i mjesnu samoupravu provjerava kandidatske liste putem Centra za birački spisak i provjerene kandidatske liste dostavlja Komisiji za provođenje izbora.

Član 14.

(Utvrdivanje konačne kandidatske liste)

(1) Komisija za provođenje izbora utvrđuje konačnu kandidatsku listu za mjesne zajednice najkasnije u roku od 15 dana prije dana održavanja izbora.

(2) Kandidatura će biti odbijena ako predloženi kandidat nema prebivalište na području mjesne zajednice za koju se kandiduje i ako nije priložena pisana izjava o prihvatanju kandidature.

(3) Prijedlozi kandidata su na konačnoj kandidatskoj listi poredani po redosljedu kojim su dostavljeni Službi za opću upravu i mjesnu samoupravu.

Član 15.

(Forma i sadržina glasačkih listića)

(1) Glasanje se sprovodi putem glasačkih listića.

(2) Glasачki listići su štampani na listovima papira A4 formata bijele boje, a na svaki listić otisnut je pečat Gradskog vijeća.

(3) Prijedlozi kandidata su na glasačkim listićima poredani po redosljedu kojim su utvrđeni na konačnoj kandidatskoj listi.

Član 16.

(Postupanje sa ovjerenim glasačkim listićima)

(1) Odštampani i ovjereni glasački listići čuvaju se u prostorijama Službe za opću upravu i mjesnu samoupravu, u zatvorenim kovertama na kojima je pečat Gradskog vijeća.

(2) Birački odbori preuzimaju glasačke listiće na dan održavanja izbora zajedno sa obrascima za provođenje izbora (zapisnik i izvještaj).

DIO PETI- POSTUPAK GLASANJA

Član 17.

(Provjera izvoda iz Centralnog biračkog spiska)

(1) Za svakog građanina koji glasa vrši se provjera da li se nalazi na izvodu iz Centralnog biračkog spiska za biračko mjesto koje ulazi u sastav mjesne zajednice.

(2) Svaki građanin za kojeg se utvrdi da se ne nalazi na izvodu iz Centralnog biračkog spiska za biračko mjesto koje ulazi u sastav mjesne zajednice, usljed promjene adrese stanovanja ili promjene naziva ulice ili kućnog broja moći će glasati na biračkom mjestu u

sastavu mjesne zajednice kojoj pripada po mjestu prebivališta, uz predočenje potvrde o prebivalištu.

(3) Predsjednik ili član biračkog odbora utvrđuje identitet birača na osnovu važećeg ličnog dokumenta (lična karta, vozačka dozvola ili pasoš).

Član 18.

(Isticanje konačne kandidatske liste)

U prostoriji u kojoj se obavlja glasanje na vidnom mjestu mora biti istaknuta konačna kandidatska lista.

Član 19.

(Postupak glasanja)

(1) Predsjednik ili član biračkog odbora utvrđuje da li je prisutni građanin upisan u Centralni birački spisak za biračko mjesto u mjesnoj zajednici u kojoj se sprovode izbori, te mu nakon toga daje glasački listić.

(2) Prilikom preuzimanja glasačkog listića, građanin se potpisuje na izvod iz Centralnog biračkog spiska pored svog imena.

(3) Građanin popunjava glasački listić u za to predviđenom prostoru.

(4) Glasanje se vrši zaokruživanjem rednog broja ispred prezimena kandidata.

(5) Od svih predloženih kandidata, zaokružiti se može najviše onoliko kandidata koliko se bira članova savjeta za mjesnu zajednicu.

(6) Građanin lično stavlja presavijen glasački listić u glasačku kutiju.

Član 20.

(Održavanje reda na biračkom mjestu)

(1) Predsjednik biračkog odbora, zajedno sa ostalim članovima biračkog odbora, održava red na biračkom mjestu i njegovoj okolini.

(2) Ako se red na biračkom mjestu naruši, predsjednik biračkog odbora može zatražiti pomoć policije.

(3) Glasanje se prekida dok se na biračkom mjestu nalaze pripadnici policije.

(4) Predsjednik biračkog odbora može sa biračkog mjesta i njegove okoline udaljiti svako lice koje narušava red.

(5) Svako udaljavanje sa biračkog mjesta bit će zabilježeno u zapisnik o radu biračkog odbora.

Član 21.

(Zapisnik o radu biračkog odbora)

(1) Tokom procesa glasanja vodi se zapisnik o radu biračkog odbora u koji se unose podaci o broju glasačkih listića, zapažanja o svim važnim događajima do kojih dođe na biračkom mjestu i drugi važni podaci.

(2) Prije početka glasanja, birački odbor u prisustvu građana će izložiti prazne glasačke kutije i zapečatiti ih, prebrojati i upisati u zapisnik ukupan broj birača za biračko mjesto na osnovu izvoda iz Centralnog biračkog spiska i prebrojati i upisati u zapisnik ukupan broj svih glasačkih listića koji su pripremljeni za to biračko mjesto.

DIO ŠESTI- BROJANJE GLASOVA

Član 22.

(Postupak brojanja glasova)

- (1) Birački odbor utvrđuje rezultate glasanja nakon završetka procesa tajnog glasanja.
- (2) Brojanje glasova vrši se na mjestu glasanja.
- (3) Brojanju glasova mogu prisustvovati i građani mjesne zajednice ukoliko ne remete proces brojanja.
- (4) Birački odbor prvo broji neiskorištene i upropaštene glasačke listiće i stavlja ih u odvojene kovertе, koje se nakon toga zapečate.
- (5) Birački odbor nakon toga utvrđuje ukupan broj glasača koji su glasali na glasačkom mjestu i upisuje ove podatke u zapisnik.
- (6) Birački odbor otvara glasačku kutiju, utvrđuje ukupan broj glasačkih listića u kutiji i upisuje u zapisnik.
- (7) Birački odbor, zatim, utvrđuje broj važećih i broj nevažećih glasačkih listića.
- (8) Birački odbor, nakon toga, pristupa utvrđivanju broja glasova za svakog kandidata pojedinačno.
- (9) Glasački listić iz koga se ne može utvrditi kako je građanin glasao, ili glasački listić na kojem su dopisana imena kandidata, ili oznake na osnovu kojih se može utvrditi identitet birača, ili glasački listić na kojem je zaokruženo više kandidata nego što se bira u toj mjesnoj zajednici, smatra se nevažećim.

Član 23.

(Izveštaj o rezultatima glasanja)

- (1) Nakon završetka postupka brojanja glasova, birački odbor u izvještaj o rezultatima glasanja unosi sljedeće podatke:
 - a) ukupan broj neiskorištenih glasačkih listića
 - b) ukupan broj upropaštenih glasačkih listića
 - c) ukupan broj glasača koji su glasali na glasačkom mjestu
 - d) ukupan broj glasačkih listića u glasačkoj kutiji
 - e) ukupan broj važećih glasačkih listića
 - f) ukupan broj nevažećih glasačkih listića i
 - g) ukupan broj glasova za svakog pojedinačnog kandidata na kandidatskoj listi
- (2) Zapisnik o radu biračkog odbora i izvještaj o rezultatima glasanja potpisuju svi članovi biračkog odbora

DIO ŠESTI- POSMATRAČI

Član 24.

(Predlaganje posmatrača)

- (1) Izborni postupak mogu posmatrati ovlašteni posmatrači.
- (2) Posmatrače predlažu predlagači lista kandidata, kao i druga zainteresirana lica, s tim da samo jedan posmatrač koji je predstavnik jednog predlagača može biti istovremeno prisutan na biračkom mjestu.
- (3) Prijedlog posmatrača dostavlja se u pisanoj formi Službi za opću upravu i mjesnu samoupravu i to najkasnije u roku od tri dana prije dana održavanja izbora.
- (4) Komisija za provođenje izbora posmatračima izdaje službenu akreditaciju.

Član 25.

(Prava i obaveze posmatrača)

- (1) Za vrijeme posmatranja izbornih aktivnosti posmatrači će nositi službene akreditacije i neće nositi bilo kakva obilježja ili oznake koje ih povezuju s određenom političkom strankom, predlagačem kandidata, kandidatskom listom ili kandidatom.
- (2) Po dolasku na biračko mjesto, posmatrač je dužan predsjedniku biračkog odbora pokazati lični dokument.
- (3) Predsjednik biračkog odbora će provjeriti da li se ime posmatrača nalazi na spisku posmatrača za tu mjesnu zajednicu, a zatim će u zapisnik o radu biračkog odbora upisati ime i prezime posmatrača i vrijeme kad je došao, kao i vrijeme kad je otišao.
- (4) Predsjednik biračkog odbora će zadržati lični dokument posmatrača do njegovog odlaska s biračkog mjesta.
- (5) Ako primijeti nepravilnosti u radu biračkog odbora, posmatrač može tražiti da se u Zapisnik o radu biračkog odbora unesu obrazložene primjedbe na rad biračkog odbora koje moraju biti potpisane od strane posmatrača.
- (6) Ako posmatrač tokom posmatranja ometa izborni proces, predsjednik biračkog odbora će ga prvo opomenuti i unijeti opomenu u zapisnik o radu biračkog odbora, a ukoliko ometanje ne prestane i poslije opomene, udaljit će ga sa biračkog mjesta, što će također unijeti u Zapisnik.

DIO SEDMI-OBJAVLJIVANJE I POTVRĐIVANJE REZULTATA IZBORA

Član 26.

(Objavljivanje izvještaja o rezultatima glasanja)

(1) Nakon završenog brojanja glasova, birački odbor objavljuje izvještaj o rezultatima glasanja.

(2) Izvještaj o rezultatima glasanja objavljuje se na oglasnoj tabli mjesne zajednice.

(3) Za članove savjeta izabrani su oni kandidati koji su dobili najveći broj glasova do broja članova savjeta koji se biraju.

(4) Sljedećih deset kandidata s konačne liste kandidata, preko broja koji se bira, čine zamjensku listu kandidata čija se imena i broj dobijenih glasova unose u izvještaj o rezultatima glasanja.

(5) Kandidat s konačne liste s najvećim brojem dobijenih glasova je predsjednik mjesne zajednice.

Član 27.

(Postupak javnog žrebanja)

(1) Ukoliko dva ili više kandidata s najvećim brojem glasova s konačne liste kandidata dobiju isti broj glasova, predsjednik mjesne zajednice izabrat će se javnim žrijebanjem.

(2) Javno žrijebanje obavlja birački odbor na biračkom mjestu odmah po objavljivanju izvještaja o rezultatima glasanja i to na način da predsjednik biračkog odbora ispisuje na listićima papira imena kandidata s istim najvećim brojem glasova, presavija listiće i stavlja ih u prozirnu posudu, zatim izvlači jedan listić sa imenom kandidata, te naglas (javno) saopćava ime izvučenog kandidata. Ime izvučenog kandidata se upisuje u zapisnik o radu biračkog odbora.

(3) U slučaju da dva ili više kandidata s najmanjim brojem glasova imaju isti broj glasova, a jedan od njih treba ući u savjet mjesne zajednice, član savjeta izabrat će se žrijebanjem na način opisan u stavu (2) ovog člana.

Član 28.

(Izjava o prihvatanju mandata)

(1) Izabrani kandidati za članove savjeta mjesne zajednice dužni su potpisati izjavu o prihvatanju ili odbijanju mandata u roku od sedam dana od dana održavanja izbora, o čemu se izdaje uvjerenje.

(2) U slučaju odbijanja mandata ili odbijanja potpisivanja izjave o prihvatanju ili odbijanju mandata, mandat se dodjeljuje sljedećem kandidatu sa najvećim brojem glasova.

Član 29.

(Potvrđivanje rezultata izbora)

(1) Rezultate izbora za članove savjeta mjesne zajednice i predsjednike mjesnih zajednica potvrđuje Gradsko vijeće.

(2) Gradsko vijeće donijet će odluku o potvrđivanju rezultata izbora za organe mjesnih zajednica ako utvrdi da je na izbore izašla 1/10 birača upisanih u Izvod iz centralnog biračkog spiska za područje mjesne zajednice ili najmanje 50 (pedeset) takvih birača u kojima je 1/10 birača manja od tog broja.

Član 30.

(Ponovno raspisivanje izbora)

(1) Ako Gradsko vijeće utvrdi da nisu ispunjeni uvjeti za potvrđivanje rezultata izbora iz člana 29. ove Odluke, donijet će odluku o ponovnom raspisivanju izbora.

(2) Gradsko vijeće donijet će odluku o ponovnom raspisivanju izbora i u slučaju da ustanovi da je u izbornoj proceduri došlo do nepravilnosti koje mogu utjecati na rezultate glasanja.

DIO OSMI- MANDAT ČLANOVA SAVJETA

Član 31.

(Trajanje mandata)

(1) Mandat članova savjeta mjesnih zajednica izabranih na redovnim izborima traje četiri godine i teče od dana stupanja na snagu odluke Gradskog vijeća kojom se potvrđuju rezultati izbora za predsjednike mjesnih zajednica i članove savjeta mjesnih zajednica.

Član 32.

(Imenovanje novog člana savjeta i predsjednika mjesne zajednice)

(1) U slučaju prestanka mandata članova savjeta mjesne zajednice i predsjednika mjesne zajednice prije isteka vremena na koje su izabrani, za predsjednika mjesne zajednice imenovat će se sljedeći kandidat s najvećim brojem glasova dobijenih u postupku provođenja izbora za članove savjeta mjesnih zajednica, a za člana savjeta mjesne zajednice imenovat će se prvi kandidat sa zamjenske liste.

(2) Odluku o imenovanju novog člana savjeta i predsjednika mjesne zajednice donosi Gradsko vijeće.

DIO DEVETI- SREDSTVA ZA ODRŽAVANJE IZBORA

Član 33.

(Sredstva za održavanje izbora)

Sredstva za održavanje izbora za članove savjeta mjesnih zajednica i predsjednike mjesnih zajednica obezbjeđuju se u budžetu Grada Bihaća.

Član 34.

(Korištenje sredstava)

(1) Sredstva za održavanje izbora odnose se na materijalne troškove i sredstva za naknade za rad organa za provođenje izbora.

(2) Sredstva za materijalne troškove su sredstva za osiguranje materijalnih uvjeta za provođenje izbora.

(3) Visina sredstava za naknade za rad organa za provođenje izbora utvrdit će se posebnim zaključkom gradonačelnika.

DIO DESETI-PRELAZNE I ZAVRŠNE ODREDBE

Član 35.

(Primjena Uputstva)

Sva pitanja koja nisu uređena ovom Odlukom, a odnose se na postupak izbora, uredit će se Uputstvom o radu biračkih odbora u postupku izbora članova savjeta i predsjednika mjesnih zajednica .

Član 36.

(Stručni i administrativno-tehnički poslovi)

Stručne i administrativno-tehničke poslove u vezi sa provođenjem izbora za predsjednike i članove savjeta mjesnih zajednica obavlja Služba za opću upravu i mjesnu samoupravu.

Član 37.

(Pomoćno osoblje za provođenje izbora)

(1) Gradonačelnik imenuje pomoćno osoblje za provođenje izbora sa zadatkom pripremanja i opremanja biračkih mjesta.

(2) Pomoćno osoblje ima pravo na naknadu za svoj rad, što će se utvrditi posebnim zaključkom gradonačelnika.

Član 38.

(Stupanje na snagu)

Ova Odluka stupa na snagu danom objavljivanja u Službenom glasniku Grada Bihaća.

Broj: _____/17

Datum: _____2017. godine

Predsjedavajući Gradskog vijeća
Davor Župa